

Date – 22/05/2024

Time - 18:30 Hrs

1. Chief Minister Pu Lalduhoma kaihhruaiin vawiin khan Mizorama thar chhuah buhhum lei khawm chungchang sawiho a ni.
2. Vawiin khan International Day for Biological Diversity 2024 pualin Aizawlah hun hman a ni.
3. Lok Sabha inthlan thawh sarihna State 7 leh UT 1 a neih turah candidate 904 an awm dawn.
4. Iran President vuinna tel turin Vice President Jagdeep Dhankar chuan vawiin khan Iran khawpui Tehran a thleng.

<><><>

### **MIZORAM PADDY & RICE PROCUREMENT COMMITTEE**

Chief Minister Pu Lalduhoma kaihhruaiin vawiin khan Mizorama thar chhuah buhhum lei khawm chungchang sawiho a ni.

Agriculture Minister Pu PC Vanlalruata, Food, Civil Supplies & Consumer Affairs Minister Pu B. Lalchhanzova leh official pawimawh te an thukhawm.

Vawiina thutkhawmah hian Supply Minister Pu B. Lalchhanzova chuan sawrkarin buhfai lei leh hralh a kalpui thin dan chu tihdanglam hlek an tum a ti a. Model Code of Conduct hlih a nih hunah a taka kalpui tan an tum dawn tih sawiin an kalphung thar turah kumtin sawrkar sum cheng vbch 70 vel hum theih an beisei tih a sawi.

Thutkhawmah hian Minimum Support Price pea Mizoram loneitute tharchhuah buh hum man man taka leisak chungchang sawi a ni a, hemi kaihhnawih buh thar chhuah tihpun dan tur leh a chingtu tur thlan a, a chi inang chin a tul dan leh leikhawm bakah a herna leh a phurh kual dan thlengin sawiho a ni a, Tripura leh Assam sawrkarin hetiang an kalpui dan report zirchiangtute hnen atangin ngaihthlak niin Chipchiar zawka lo zirchiang tur team Supply Minister kaihhruaina hnuaiiah din nghal a ni bawk.

<><><>

### **TOURISM MEETING**

Mizoram Tourism Department a thawk te nen Kum tawp a Festival neih tur chungchang ah vawiin khan meeting an nei a,

Kum tin a buatsaih thin Winter Festival chu kumin ah pawh neih leh tur a ni a. Kum bul atanga ruahmanna fel leh thazawk a awm thei nan te, Mizoram chhunga hnam tin te telna kut a nih theih nan te, khualzin tam zawk an awm theih nan te, Mizoram mawina leh festival te zuar tur hian Marketing team pawh din a ni tawh a ni tih meeting ah hian tarlan a ni.

2024 Winter Festival leh Leitlangpui Music Festival chu a buatsaihtu tur Event Management te hnen ah tender hmanga zawn ni se an ti bawk.

Tourism Minister Pi Lalrinpuii chuan Anthurium Festival ti tawpa Leitlangpui Music Festival huaihawt a nih tur thu ZPM inkhawmah a lo sawi tawh a, Pi Lalrinpuii chuan Mizoram-ah Festival pahnih Winter festival leh Anthurium festival te chu Central hriatpui festival leh tanpuina pawisa a pek thin a ni a, Anthurium festival erawh mipuiin an ngaihhlut tawk loh nia an hriat avangin avangin tih tawp a ni a, a aiah Leitlangpui Music Festival hi Lungleiah nei tura hmalak mek a ni,”a t a ni.

<><><>

## CM

Chief Minister Pu Lalduhoma'n Sipai Lal Lt. Gen, RC Tiwari nen an inkawmna ah Mizoram leh Myanmar inrina Friendship Bridge tunhnaia Assam Rifle ten anlo khar chu thleng nawn tawhlo se a duh a tih a sawi.

Pu Lalduhoma chuan nimin tlaia Lt. Gen. RC Tiwari, General Officer, Commanding - in- Chief, Eastern Command nen an inkawmna ah he thu hi sawiin tunhnaia Myanmar nena inrina chu Home Ministry leh Mizoram Sawrkar hriatpui lohin khar ani a ti a, hetiang hmalakna chu thleng nawn tawhlo se a duh tih a sawi.

Chief Minister chuan Assam Rifle ten mipuite nunphung nghawng thei engemaw thiltih an neih dawnin state sawrkar nen inrawn tawna hma la zel turin a duh tih a sawi a, Zokhawsanga AR ram paltlanga loneitute feh kawng thar laih chu an ngai pawimawh tih sawiin AR Ground chu Aizawl lailia awm a nih avangin mipuiin an mamawh fo a, Politics thila punkhawm ni lo thil dangah pawh tun aia zalen zawka an hman theih a duh thu a sawi a, Mizoram sawrkarin nasa taka ruihhlo do tuma ke a penna ah nasa taka tan lak pui turin a sawm bawk a ni.

Lt. Gen RC Tiwari chuan Mizorama awm sipai ten Chief Minister ngenna leh rawtna chu an ngai pawimawh tur a ni a ti a, Kawng tinrengah sawrkar an thawhpui dawn tih sawiin AR Ground hman chungchangah a nau te alo hrilh tur thu sawiin Zokhawsang ram pawh a rang lama ngaihtuah a nih tur thu a sawi a, Ruihhlo do chungchangah theihtawp an chhuah pui dawn tih a sawi bawk.

<><><>

## PUBLIC LIBRARY DAY 2024

Vawiin khan Millennium Center kawtzawl ah Mizoram State Library, Art & Culture Department huaihawtin Public Library Day hman a ni.

Vawiina hun hmanah hian Public Library Day pualin Library Membership and Awareness drive neih a ni a. Library a lehkhabu thenkhat te he hun ah hian pochhuah niin a duh apiang tana hawh theih leh chhiar theih tura ruahman a ni a, heng bakah hian a duh apiang tan Member atana inziah luh theih niin kal khawm mipui a tam thei ang ber hnenah Library Brochure sem a ni.

Kum 2015 khan Raja Rammohan Roy Library Foundation (RRRLF) chuan Social Reformer ropui Raja Rammohan Roy piancham May ni 22 chu amah hriatreng nan Public Library Day atan a puang a. He ni pual hian Mizoram Public Library hrang hrang te chuan theih ang angin he ni pual hian hun an hmang thin a ni.

<><><>

## BIOLOGICAL DIVERSITY DAY

Vawiin khan International Day for Biological Diversity 2024 chu Mizoram State Biodiversity Board buatsaihin Forest Training School Conference Hall Bethlehem Vengthlang ah neih a ni a.

He hunah hian PCCF Mizoram Pu AK Biswal -a'n a hmanpui a. Pu AK Biswal chuan Biodiversity humbalhna lama mipuite fuihna thuchah a sawi a, ram neitute leh a mi chengten biodiversity humhalhna lama an tih tur leh mawhphurhnate tarlangin hemi kawngah hian mipuite nasa zawka tan la turn a sawm a, Danin a phut angin kanchanvo leh mawhphurhnate hlenchhuak thei theuh turn kan tanrual a pawimawh a nitih a tarlang. Tuchhuan lo awm zel tur te chenna tlaka ram siam turin mimal tin ten mawhphurhna an nei vek a ti. Kumina International Day for Biological Diversity thupui atan 'Ruahmanna ah tel ve ta che' (Be Part of the Plan) tih thlan a ni a. Kumin thupui in a tum ber chu sorkar, khawtual mi leh tualchhung mite, non-governmental organization, dan siamtute, sumdawngte, leh mimal tinte, Biodiversity Plan kalpui dan tur an thlawp dante pholanna tura hmalak anih theih nana neih thin a ni a. Hemi ni puala essay writing competition leh speech buatsaiha lawmman la te hnenah chawimawina sem nghal a ni.

<><><>

## CM

Chief Minister Pu Lalduhoma chuan vawiin khan a office-ah Mizoram Environment & Forest Consultative Forum (MEFCOF) hruaitute a kawm a.

Chief Minister hian, mahni sum leh pai senga ramngaw humhalh leh tuihna tihpunna lam buaipuitu MEFCOF chu pawl zahawm tak nia a hriat thu a lo hrih a. An ruahmanna te a hlawhtlin theih nan sawrkar pawhin thawhpui zel a tum dawn tih lo hrihlin, an ruahmanna te chu ziaka thlen turin a chah a ni.

MEFCOF hian an bul tan nan kum 2004 khan Neihdawnah Zo Thei Huan an siam a, a hnuah Chawngtlaiah an din leh a, khaw hrang hrangah kalin ramngaw humhalh tulna an zirtir zel a. Zo Thei Huan Committee din zelin chung pawl te chuan an khaw Zo Thei Huan chu an enkawl zel a, tunah hian khaw 174 ah Zo Thei Huan hi an din tawh a ni.

An thupui ber chu "khawih loh" tih a ni a. Khawtinah humhalh theih ngaw awm te tha taka humhalh a, nungchate pawh zalen taka awmtir chu an tum ber a ni. Tin, tuihna kam zel a lo pun thar theih nana Rain Garden Policy an duan chu Chief Minister hmaah sawifiahin; Tlawng lui tuihna tipung tura pilot project kalpui an duh thu an thlen nghal a ni.

An pawl hruaitu Pu VL Bela hian kum 1975 atang khan Tlawng lui hi a hun leh hmun ngaiah kumtin tui san zawng a la teh ziah thin.

<><><>

## 7<sup>TH</sup> PHASE

Lok Sabha inthlan thawh sarihna State 7 leh UT 1 a neih turah candidate 904 an awm dawn. Election Commissioni chuan Parliamentary Constituency 57 ah nomination 2105 a luh thu a sawi a. Heng nomination te hi endik anih hnuah 945 chu pawm a ni a. Punjab chu nomination thehluh tamna ber niin 598 a lut a ni.

Inthlan thawh sarihna hi UP leh Punjab-ah seat 13, West Bengal ah seat 9, Bihar ah seat 8, Odisha ah seat 6, Himachal Pradesh ah seat 4, Jharkhand ah seat 3 leh Chandigarh UT a seat 1 ah te buatsaih a ni dawn a. June ni 1 ah vote thlak a ni ang a, inthlan pumpui vote hi June ni 4 ah chhiar a ni ang.

<><><>

## VP REACHED IRAN

Vice President Jagdeep Dhankar chuan vawiin khan Iran khawpui Tehran a thleng a. Iran sawrkar mi pawimawh taktakten an lo dawngsawn a ni

Iran-a cham chhungin Iran President thi ta Dr. Sayed Ebrahim Raisi, Foreign Minister Dr. Hossein Amir-Abdollahian leh official dang helicopter chesuala thi te vuinaah a tel dawn a ni.

President Draupadi Murmu, Prime Minister Narendra Modia leh External Affairs Minister Dr.S. Jaishankar te chuan Dr. Raisi leh AMir Abdollahian te chu an ui thu an lo sawi tawh a.

Hetihlai hian Iran President thi ta Ebrahim Jaisi thlak tur President thar June ni 28 ah thlan a ni dawn a. Iran ram danah chuan President hi ni 50 chhunga thlan tur a ni a. Supreme Leader Ayatollah Ali Khamenei chuan Vice President Mohammad Mokhber chu President lailawk atan a lo ruat hrih a ni.

<><><>

## CAMPAIGNING GAINS MOMENTUM

Lok Sabha inthlan thawh hnih la awm atan ngawrh takin Political Party te an campaign mek a. Uttar Pradesh ah chuan inthlan thawh rukna leh thawhsarihna atan star campaigner te hmun hrang hrangah an campaign a. Prime Minister leh senior BJP leader Narendra Modia chuan vawiin khan Basti leh Shravasti bialah thu a sawi a. BJP hruaitu leh UP Chief minister Yogi Adityanath pawhin Jaunpur, Basti, Sultanpur, Siddarth nagar leh Balrampur district ah te hun a hmang a ni.

Hei bakah BSP hruaitu Mayawati pawh Sultanpur-ah hian a campaign mek a, Samajwadi Party hruaitu Akhilesh Yadav pawhin Azamgarh ah thu a sawi baw.

Vawiin vek khan Prime Minister Narendra Modia leh Congress President Mallikarjun Kharge te chuan Delhi-a vantlang inkhawmah hun an hmang baw a ni.

<><><>